



sra. Dymphna van der Lans

“Islanan no ta causante di cambio di clima, pero ta wordo afecta si”

ORANJESTAD- CEO di ‘Clinton Climate Initiative’, sra. Dymphna van der Lans tabata parti di un panel den e di seis Green Aruba Conference.

Sra. van der Lans a cera conoci cu Aruba na ocasion di un tema cu ta di vital importancia pa e fundacion ‘Clinton Climate initiative’ cu ta e discusion riba cambio di clima y energia renoba. Esaki den un esfera di ‘ban yuda otro’ y pone un stop na e cambio di clima cu ta afecta islanan chikito. Den oranan di diaranson mainta sra. van der Lans tabata presente na un desayuno cu 26 hende muhe mas pa hunto combersa cu otro riba topiconan cu ta regarda e hende muhe y su participacion den trabounan importante y esencial.

Clinton Climate Initiative ta un fundacion cu ta traha cu programanan riba un base internacional. “Un di nos programanan mas importante y e motibo cu mi ta na Aruba

ta e programa cu ta regarda e islanan. Nos ta traha cu mas o menos 15 isla den Caribe, Pacifico y Oceano Indio. Nos ta yuda nan den e transicion di uzo di diesel pa energia renoba.” Sra. van der Lans a splica cu nan ta mirando progreso di nan trabou. Pero... “Nos por haci mas progreso? Semper. Nos ta sinti cu nos ta haci bastante? Absolutamente cu no. Mas por wordo haci? Sigur!”.

Di e forma aki sra. van der Lans a duna un idea di e trabou y e situacion actual. E islanan cu e fundacion ta traha cu nan ta hopi apasiona y kier mira lihe un cambio positivo. Ora ‘Clinton Climate Initiative’ ta trece cambionan riba un isla mesora e otro nan ta sigui e ehempel. “Nos forma di traha ta muestra con e trabou mester wordo haci y yuda e otro nan den replica esaki.”

President Clinton ta traha cu masha pasion cu e islanan Caribense, Pacifico y di Ocean Indio. “Esaki pasobra

e islanan no ta causante di e cambio di clima, pero nan ta su prome victimanan si. Un situacion inhusto. E cambionan di clima ta impactante afectando e islanan den forma desproporcional. Nos deseo pa yuda e islanan no ta solamente den transicion di diesel pa energia renoba, pero tambe pa nan ta miho prepara, flexibel y resistente den ataca y contra aresta e menasanan cu cambio di clima te trece cun’e.” Sra. v.d. Lans a bisa cu el a keda masha inspira pa e discurso di Prome Minister Eman den cual el a subraya cu energia humano ta e poder mas grandi cu tin. E mensahe di Eman pa e otro islanan ta pa na tur momento nan cuida y proteha nan baranca. Nos trabou ta pa crea comunidatnan dinamico y resistente cu kier cuida y proteha e luga unda nan a nace y lanta. E hendenan cu ta biba riba e islanan ta un inspiracion pa nos. Ta p’esey nos ta stima nos trabou asina tanto.” □